



Pàigheadh Taic Luchd-cùraim

Dè th' ann am Pàigheadh Taic Luchd-cùraim?

Ann an Alba, tha Pàigheadh Taic Luchd-cùraim a' dol an àite Cuibhreann Luchd-cùraim bho Roinn na h-Obrach is nam Peinneanan (DWP). 'S e Pàigheadh Taic Luchd-cùraim airgead do dhaoine a tha a' coimhead às dèidh cuideigin le ciorram no air a bheil eucail slàinte fad-ùine.

Tha an t-sochair ga toirt a-steach beag air bheag. Tha comas air a bhith aig daoine a tha a' fuireach ann an sgìrean ùghdarras ionadail Pheairt is Ceann Rois, Baile Dhùn Dè agus nan Eilean Siar iarrtas a chur a-steach airson Pàigheadh Taic Luchd-cùraim bho chionn 20 Samhain 2023.

Bidh Pàigheadh Taic Luchd-cùraim ri fhaighinn air feadh na h-Alba as t-Fhoghar 2024.

Cò as urrainn iarrtas a dhèanamh?

Gus a bhith airidh, feumaidh neach-cùraim

- a bhith 16 no nas sine
- 35 uairean a thìde de chùram gun phàigheadh a thoirt do chuideigin de dh'aois sam bith gach seachdain, a tha a' faighinn sochairean ciorraim àraidh
- a bhith a' cosnadh £151 no nas lugha gach seachdain sa chumantas às dèidh beagan lùghdachaidhean
- a bhith a' fuireach ann an sgìre far a bheil an t-sochair ri fhaighinn

Dè as fhiach Pàigheadh Taic Luchd-cùraim agus cuin a thèid a phàigheadh?

Thèid Pàigheadh Taic Luchd-cùraim a phàigheadh aig an aon ìre ri Cuibhreann Luchd-cùraim. Is e seo £81.90 gach seachdain an-dràsta no £327.60 gach 4 seachdainean.

Am faod cuideigin Pàigheadh Taic Luchd-cùraim fhaighinn ma tha iad a' faighinn shochairean eile?

Faodaidh daoine Pàigheadh Taic Luchd-cùraim fhaighinn aig an aon àm 's a tha iad a' faighinn shochairean eile. Ma tha iad a' faighinn shochairean 'a rèir teachd a-steach' leithid Creideas Coitcheann, dh'fhaodadh Pàigheadh Taic Luchd-cùraim buaidh a thoirt air an t-suim a gheibh iad. Mar as trice 's fheàrrde iad e uile gu lèir air sgàth 's gum faigh iad suim a bharrachd sna sochairean seo airson a bhith nan luchd-cùraim.

Ma tha neach-cùraim a' faighinn sochairean 'ionadachadh teachd a-steach' leithid Peinnean na Stàite no Cuibhreann Cosnadh is Taice san 'nòs ùr', dh'fhaodadh seo buaidh a thoirt air an t-suim de Phàigheadh Taic Luchd-cùraim a gheibh iad.

Ma tha an t-sochair co-ionann ri no nas motha na Pàigheadh Taic Luchd-cùraim, dh'fhaodadh gum bi 'airidheachd fon uachdar' aca. Tha seo a' ciallachadh nach fhaigh iad airgead sam bith ann am Pàigheadh Taic Luchd-cùraim, ach dh'fhaodadh iad sochairean a bharrachd fhaighinn, no barrachd a chur ri sochairean a th' aca mar-thà, a' gabhail a-steach Creideas Peinnein.

Far a bheilear a' faighinn Pàigheadh Taic Luchd-cùraim, am bi sin a' toirt buaidh air sochairean an neach a tha a' faighinn cùram?

Cha bu chòir buaidh a bhith air sochairean an neach a tha a' faighinn cùram (a' gabhail a-steach Pàigheadh Ciorram Inbheach, Pàigheadh Ciorram Cloinne, Pàigheadh Neo-eisimeileachd Pearsanta, agus Cuibhreann Ciorram Bith-beò) air sgàth 's gu bheil an neach-cùraim aca a' faighinn Pàigheadh Taic Luchd-cùraim.

Ma tha an neach a tha a' faighinn cùram a' faighinn Tàilleabh Droch-chiorram – suim a bharrachd a th' air a gabhail a-steach ann an cuid de shochairean a rèir teachd a-steach – cuirear mar as trice stad orra seo fhaighinn ma tha an neach-cùraim aca a' faighinn Pàigheadh Taic Luchd-cùraim. Dh'fhaoidte gun cuirear stad orra Cìs Comhairle lùghdaichte fhaighinn cuideachd.

Dè ma tha cuideigin a' faighinn Cuibhreann Luchd-cùraim bhon DWP mar-thà?

Chan fheum daoine a tha a' fuireach ann an Alba agus a' faighinn Cuibhreann Luchd-cùraim cur a-steach airson Pàigheadh Taic Luchd-cùraim. Thèid an duais aca a ghluasad gu fèin-obrachail bho Chuibhreann Luchd-cùraim gu Pàigheadh Taic Luchd-cùraim. Gheibh iad litir a dh'innse dhaibh cuin a bhios seo a' tachairt.

Am faod oileanaich Pàigheadh Taic Luchd-cùraim fhaighinn?

Faodaidh luchd-cùraim uile a tha nan oileanaich de dh'aois 20 agus nas sine cur a-steach airson Pàigheadh Taic Luchd-cùraim. Cha bhi oileanaich de dh'aois 16-19 airidh ma tha iad ag ionnsachadh air cùrsaichean àraidh làn-ùine, a' gabhail a-steach Ìrean Nàiseanta no Àrd-ìre aig àrd-sgoil no colaiste.

Bidh tuilleadh oileanaich ann an Alba airidh air Pàigheadh Taic Luchd-cùraim na Cuibhreann Luchd-cùraim, an t-seann sochair. Chan eil Cuibhreann Luchd-cùraim ri fhaighinn ach do dh'oileanaich phàirt-ùine.

Ma tha oileanach a' faighinn Cuibhreann Luchd-cùraim agus ag iarraidh ionnsachadh làn-ùine, 's dòcha gum faod iad cur a-steach airson Pàigheadh Taic Luchd-cùraim nuair a tha e ri fhaighinn far a bheil iad a' fuireach.

Taic airgid a bharrachd

Bidh luchd-cùraim a tha a' faighinn Pàigheadh Taic Luchd-cùraim, no Cuibhreann Luchd-cùraim bhon DWP, air ceann-latha àraidh, a' faighinn Sochair-leasachaidh Cuibhreann Luchd-cùraim cuideachd. 'S e pàigheadh fèin-obrachail a tha seo de £288.60 dà thuras sa bhliadhna.

Ciamar a chuireas daoine iarrtas a-steach?





Gheibhear tuilleadh fiosrachaidh agus faodar iarrtas a chur a-steach air-loidhne aig **mygov.scot/carersupport**. Faodaidh daoine cuideachd cur a-steach air a' fòn no foirm-iarrtais pàipeir iarraidh tron phost le bhith a' cur fòn thugainn an-asgaidh air **0800 182 2222**.

Tha taic airson cur a-steach ri fhaighinn bho ar comhairlichean anns gach ùghdarras ionadail ann an Alba. Faodaidh luchd-cùraim fios a chur thugainn gus coinneamh a chur air dòigh aig àite is àm a tha freagarrach dhaibh an dàrna cuid sa choimhearsnachd aca no aig an taigh, tro bhidio no le fòn.

Taic eile do luchd-cùraim

Faigh tuilleadh fiosrachaidh mun taic a dh'fhaodadh a bhith ri fhaighinn do luchd-cùraim aig **mygov.scot/carersupport**

Ciamar as urrainnear fios a chur thugainn?

-  Cuir fòn thugainn an-asgaidh air: 0800 182 2222
-  Seirbheis Text Relay: 18001 +0300 244 4000 (do dhaoine a tha maol sa chlaisneachd)
-  Luchd-cleachdaidh Cànan Soidhnidh Bhreatainn: contactscotland-bsl.org
-  Webchat: chat.socialsecurity.gov.scot